



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail: tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 3

Iran den ceasefire ya 'life support' nung lir: Trump

TN CM Vijay-i Congress lenirtem ajurutsü



VOL. XXIII ISSUE NO. 209 (ADOK 209) DIMAPUR RASEMNÜ (WEDNESDAY) MONUPII (MAY) 13, 2026

₹ 5.00

Article 371(A) ya khen atema dang yangluba temzüng ka lir, ibaji intoktsü Arla 368 nung tashi agüja lir



Wb. Metsübo Jamir



Wb. Sentiyanger Imchen, IAS



Wb. C.T. Jamir



Wb. Sentiyanger Pongen

Mokokchung, 12 May (TYO): Ao Senden-i ayonga Indian Temzüng Arla 371 (A) aser the Nagaland Village Council Act, 1978 onük nung shisatokden sentong tulu ka yangi Mokokchung town hall nung kaogo.

Iba sentong nung Ao Senden Sanen Luden aser Tongror Luden züngsemtemi anir tzükong mungdang, yimtsüng shia nungi yimsüsür, town unit balala den ano lenla tabensa nungi lokti tentet balala nungi ketdangsür noklang tenet dak tali adenshia shilem agia denogo.

Indian Temzüng kübok Naga nunger asoshi kechi temeten wazükja lir, itemji rajemtsü nükjidong yur tanü iba shisatokden ya ayongogo. Iba ya

shisatokden ka dang asünung, bangzüng balaka renema mayur saka tanü jembiba tongtibang onüktem ajak zülua ayutsü aser iba dak sentakba nung mendenpuri reprangshimer tim mapatem inyaksü, ta Ao Senden tir, Marsanen Imsong-i metetdaksü.

Sentong nung yimpoksür Nagaland RD & SIRD Minister, Metsübo Jamir-i jembidang, Arla 371 (A) ya Naga nunger bendanger nungi kümzüka aser asen maitsü wazüka ayutsü asoshi agütsüba temeten lir. Saka ali ajak asenok indang kümer/mekazüka yur terenlok mapa inyakdi asüdang sota ayuba yimya yabo majung, ta pai melenshidaktsünüba o ka ashi.

Paisa tatishitsü kar bener arua lemsatepdang, totzü magitetdaksütsüi noktangba, ya Tsüngremi asenok nem agütsüba temoatsü asenoki magiteter, item amala mapa aser ali agütsütsü koroba ajanga asen lima tejakleni maor, ta pai ashi. Foothill lenmang yangluba nung ya asenok lenmang aisü nung tajangzük lir, lenmang atuba ajanga dang ali jenzangja tuluba akümstsü, anungji, ali mekoroi peria agütsütsüla, ta paisa ayongzük.

Tsüngremi Aor nem tashi temetet peria agüja lir, tanga kini asenok dak rangloker aser asenoki kechi ashir ta imlar. Tsüngremi asenok mesentok lir, anungji, asenok sensena melili ta paisa ayimoktsü. Meshimetsür

kin ka masü saka pei sasa noktaktetba kin ka asütsü merangdi, ta paisa shisem.

Nagaland Chief Secretary, Sentiyanger Imchen (IAS)-i temzüng rajem o ashidang, Article 371 (A) ya Naga nunger sobaliba aser yimsüyimbong kümzüka ayutsü atema India Temzüng nung lateta aliba ka lir. Aji süaka, nisung aikadi iba tetuyuba jungjunga mangatetter aser aiben iba nükjidong aibelena ratettsür ta pai tebilemstsü olen ka lemsatep.

Tanü tashi Aor temzüng ozüngtem zülü nung adoka maka, temzüng ozüngji zülü nung ayutsübaji tongtibang, kechiyong tebang agi dang belentepba yabo khenkhenbo aibelener aser mashilen ratettsübajia ataloktsü

temenu maka, anungji, zülua ayutsüla aser tensa den apet ozüngtemji tajungba moluteta yanglushia aotsü nüngdaker, ta pai ashi.

Article 371(A) ya khen atema dang yangluba temzüng ka lir, ibaji intoktsü Arla 368 nung tashi agüja lir, ta paisa jangjashitsü. Alima nung temzüng ozüng tajungtiba alitsüa akok, saka yimsüsüri koda amshir ta asübaji tongtibangba. Anungji, tejak mereprangi ochi shia yimsü asütsüla, ta paisa ayongzük.

Ao Senden Legal Advisor & Gauhati High Court, Senior Advocate, C.T. Jamir-i "Indian Temzüng Arla 371 (A)" aser Gauhati High Court, Advocate, Sentiyanger Pongen-i "the Nagaland Village Council Act, 1978" onük nung ajemdaker jembia liasü. Onük ana nung ajemdaker o lemtep mapang ka agia liasü aser iba nung tesentepertemi mangatettepba aser jangjanüa asüngdangba onük aika shisalen sayurtemi tzüratema rajemtsü. Iba sentong nung Mokokchung District Bar Association Tir, Advocate Moludongba menden liasü aser o lemtep mapang Gauhati High Court, Advocate, Aliba Ozukum onir liasü.

Nagaland nung ULFA-I züngsem ka temai adok

Dimapur, May 12, 2026 (Agencies): Hombarnü United Liberation Front of Asom (Independent) züngsem ka Nagaland nung Assam Rifles aser tanga security agencies tsüngdang temai adokogo.

Telungpurtem dang temai adokang ta ayongzük security agencies-i outreach maparen inyaka aruba sülen telungpur

temai adok ta ketdangsürtemi ashi.

Iba mapang sepaitemi ULFA(I) telungpur ket nungi smartphone ka ngutetogo.

Northeast nung yimjung, tensa süngjemtsü aser telungpurtem rehabilitation asütsü atema maparen maneni inyaka aruba nung iba ya shilem ka lir ta ketdangsürtemi ashi.

Tuli nung Foothill Road atema senden amen

Dimapur, May 12, 2026 (TYO): Mokokchung kübok Tuli Sub-division nung Foothill Road atema tang aliba 10-metre Right of Way (ROW) tasazük dang nungi talila ulushitsü indang senden ka menogo.

Mokokchung Deputy Commissioner-i tetuyuba agütsüba nung ajemdaker iba senden ya May 11, 2026 nü Dobashi Court nung ayonga amen.

Iba senden nung Tuli Area Foothill Road Land Owners Association, Kangtsung, Kangtsungyimsen, Wameken, Wamekenyimsen aser Anaki nungi Village Council Chairmen

aser Secretaries den Tuli Sub-division kübok sendaktepa alirtem aden.

Senden nung tang teinyakdak Foothill Road mapatong dak sendakba onüktem benoka lemsatep. Talisa tang lateta aliba 10-metre Right of Way (ROW) ulushitsü indang onük lemsatep aser idangji ali kiburtem aser yimtsüng ketdangpurtemi tebilemba balala lemsatepa liasü.

Iba lenmang yangluba nung sendaktepa alir ajak den maneni public ajangzüktsü aser terenlok nung ajemdaker asüngdangtepa aotsü senden nungsa telemtetba agia tembang.

Arunachal Pradesh nung NSCN züngsem 2 khaset

Itanagar, May 12, 2026 (Agencies): Arunachal Pradesh kübok Changlang district nung National Socialist Council of Nagaland (NSCN) züngsem ana khasetogo ta tanü ketdangsürtemi metetdaksü.

Assam Rifles-i Songking yimtsüng anasa arem ka nung mita aodang telungpur den khatap. Iba ya Miao police station telongtet nung lir aser iba tesem nungi prangpong aser injangtem ngutetogo ta ketdangsürtemi ashi.

Iba tesem nung NSCN

telungpurtem lir ta osang tejangja ka angazükba sülen Assam Rifles-i operation ka tenzüka liasü. Iba tesem nung telungpurtem anenzüka liasü aser yimdaklirtem dang tashiyim agi sen meshiba maparen inyak ta osang angazüker.

Telungpurtemi yimdaklirtem dang sen agütsütsü rongshiba ajanga kanga timtema aru. Osang tejangja kar angazükba sülen sepaitemi iba tesem nung search operation tenzüker aser idangji telungpurtemi parnok dak injang

khaloktsü.

Sepaitemi aonung piyong operation agidang telungpur ana khaset aser ano tanüngba telungpurtem pua arutsü atema bushitepdar.

Ano, Arunachal Pradesh kübok Longding district nung May 11 aonung Chop yimtsüng anasa Assam Rifles aser telungpurtem khatap.

Ajisüaka, iba osang zülü tashi nung Longding nung atalokba nung nisung asüba mesüra yiruba osang kecha mali.

"Assam atema anogo tulu ka": PM Modi-i Sarma tenüngsang asanger

Guwahati, May 12, 2026 (Agencies): Himanta Biswa Sarma-i kümsük tanaben atema Assam Chief Minister inyaksü tezüngzüktep agiba sülen Prime Minister Narendra Modi-i tenüngsang agütsüogo.

"Iba ya Assam asoshi anogo tulu ka lir aser Sarma lenisüba aser ketdangsübaren nung temulung asür aser kümsük tasen moatsür" ta PM Modi-i ashi.

Modi-isa Rameswar Teli, Atul Bora, Charan Boro aser Ajanta

Neog nunger nem tenüngsang agütsü. Assam nung BJP-i aniba NDA sorkar nung parnoki minister tem ama tezüngzüktep agia liasü.

Iba sentong ya Veterinary College ground, Khanapara nung agi aser Prime Minister Modi, Union Home Minister Amit Shah, Defence Minister Rajnath Singh, BJP president Nitin Nabin, Union ministers, aser NDA ajanga yimsü asüba state tem nungi chief ministers aser deputy chief ministers aika

aden.

2026 Assam Assembly elections nung BJP-i aniba NDA ajanga menden 126 nungi 102 nung takok tulu nguteta liasü aser kümsük tasembenbuba atongtepa tashi angu.

Governor Lakshman Prasad Acharya-i CM Sarma nem tezüngzüktep agidaktsü. Arishi küm 57 tain Sarma ya Assam nung kümsük ana atongtepa inyakba mezünguba non-Congress Chief Minister lir.

Pughoboto SDPDB mapang takok angur kaketshirtem tushi



Dimapur, Monupii/May 12 (TYO): Sub-Divisional Planning & Development Board, Pughoboto ajanga May 12, 2026 nü ADC Office, Pughoboto nung HSLC aser HSSLC Examination 2026 indang Best Performing Schools aser Meritorious Students atema tetushi agütsüba sentong ka ayongzüka liasü.

Iba sentong ya January 2026 nung SDPDB senden amendang pangzüng yangluba ama ayongzü, kong Pughoboto Sub-Division telungzü, nung Government aser Private school tajungtem den Government schools nungi takok tajung anguba kaketshirtem tushitsü asoshi taküm atema SDPDB Educational Trust Fund balaka amshi tenzü.

"Award for Academic Excellence 2025-2026" kübok Government School category nungi Government High School, Lazami nem Best Performing Government School in the HSLC Examination 2026 sempet agütsü, kong pass percentage noklang shilem liasü.

Iba amaji Private School category nunga noklang shilem pass asüba mechi New Foundation School, Pughoboto nem Award for Academic Excellence agütsü.

SDPDB ajanga Government High School, Ighanumi nungi HSLC first rank holders Vitovi, Katoni aser Jekito nunger nem senpet sen agüja liasü.

Board-i assistant headmaster, tesayur aser kaketshir nema tenüngsang agüja liasü.

Iba senden nung MLA & Chairman SDPDB Pughoboto, Dr Sukhato A Sema-i jembidang school aser kaketshir temi subdivision nem tenüng tajung bener arutsüba atema

pelaba lemsatepa liasü. Pai takok angutsü asoshi temulungtetba, bendanga agütsüba aser meranga inyakba nungdaker ta ashi aseer meranga inyakba nungi süngiang teti tanang alir ta ashi.

SDPDB Educational Trust Fund ya tajemzüka jenjang nung aliba kaketshirtem yaritsü aser subdivision nung shisaluyim tashi itshitsü atema board züngsemtem ita shia bendenba lir ta pai ashi.

Paisa Government Higher Secondary School Pughoboto ya state nung Government Higher Secondary Schools tajungtiba rongnung ka lir ta ashi aser kaketshirtem dang iba reju nung azüngtsü ajungshia liasü.

Sumi Aphuyemi Kiphimi Kuqhakulu (SAKK) tir Yekivi P Sumi-i iba sentong nung o tatsüka jembidang, sentong ya kaketshir aser tesayur temi bendanga agütsür meranga inyakba benjongba amai lir ta ashi.

Kaketshir temi takok anguba ajanga subdivision ajunga jenjang tutsüogo ta ashi aser tsürabor aser MLA dang maneni ajungshitepa aser yariteptsü ayongzüka liasü.

Iba benjong nung bendenloksema August 7, 2009 küm medemer 13-i tentetba telok, Insightknots ajanga par indang "Mission Help" sentong kübok kaketshir nem teyari agüja liasü.

Iba telok yagi 2015 küm kaketshirtem sponsor süa tenzü, aser 2023 nungi küm shia Aphuyemi Government High Schools nung enroll süa aliba kaketshir HSLC examination nung marks percentage timtiba angur kaketshir ka Class XI nung sponsor süa arur.

Iba inyakyim kübok HSSS

Laza nungi Kumghato aser GHSS Ighanumi nungi Vitovi nem senpet sen 10,000 agüja liasü.

Tenüngsang agütsüba sentong ya Khekaho Achumi, Principal, GHSS Pughoboto lenisüba kübok agi aser Sulito Swu Achumi, Associate Pastor Women, Mishilimi Baptist Church ajanga sarasadem.

Sentong tembanga Meyazungba Jamir, Vice Chairman SDPDB and ADC Pughoboto ajanga melepzüng o jembidang, kaketshir aser talisa Government schools nung tesayur temi bendanga agütsüba asoshi tenüngsang agütsü.

Iba sentong magidang SDPDB senden ka MLA Dr Sukhato A Sema aser ADC Meyazungba Jamir lenisüba nung agia liasü. Iba senden tenzüka taoba SDPDB senden nung lemteta alibatem lepa reprangshia liasü aser Ighavito yimtsüng nung Health Sub-Centre ka amenoktsü indang jembia SMO Pughoboto dangi abentsü lemtet.

Iba senden nung Sub-Divisional Agriculture Officer (SDAO), Pughoboto tasenba Viwoto Zhimomi metetepa liasü.

Senden nung MLA ajanga subdivision nungi aluyimer pongu nem brush cutters lema agütsü. Dr Se, a-ia subdivision kübok yimtsüng 24 aliba ajunga lenmang tesendaktep tajungba kumtsütsü, shisaluyim aser healthcare tajungba agütsütsü asoshi temulungtetba nung lir ta ashi.

Paisa SDAO tawabangba kübok natural farming scheme tasen ka tenzüksü, koba sorkar cluster villages tenet atema sanction süogo ta matetdaksü.

DIPR-i Press Accreditation atema metetdaksür

Dimapur, Monupii/May 12 (TYO): Nüburtemi reprangtsü aser nungdakba nung amshitsü atema Accreditation Policy yanglushir official IPR website nung inokja lir, ta Department of Information and Public Relations sangdong ajanga ashi.

Iba dak sendakba nung recognised media houses nung

inyakba osangbener tem iba policy tasenba kübok accreditation tasen asoshi application meshir. Jangra alirtemi website @ <https://ipr.nagaland.gov.in/> nung updated guidelines, eligibility criteria aser application inyakyim angutsü, ta sangdong ajangasa ashi.

Dept. of Economics & Statistics ajanga metetdaksür

Dimapur, Monupii/May 12 (TYO): Data shidak bendenba, real-time reporting tajungba akumtsü aser Births and Deaths registration nung tim masüba mapa inyakba samadaksütsü mechi State nung registration of Births and Deaths ya June 1, 2026 nungi tenzüka noklang shilem online asütsü, ta Department of Economics &

Statistic, Government of Nagaland ajanga sangdong ka nung metetdaksü.

Anungji Births and Deaths registration ajunga designated CRS ORGI Portal ajanga inyaktsü. State tesem ajunga nung Manual registration of Births and Deaths ya May 31, 2026 nü nungi mamshitsü ta sangdong ajangasa ashi.

Meluri DPDB senden nung DC aser ADC tasen pela agizük



Meluri District Planning & Development Board senden May 12, 2026 nü aliba noksa nung angur.

Dimapur, Monupii/May 12 (TYO): Meluri District Planning & Development Board senden May 12, 2026 nü DB's Court, Deputy Commissioner office nung mena liasü.

Senden nung Advisor, New & Renewable Energy and NSDMA, Z Nyusietho Nyuthe-i züngsem ajunga pela agizük aser Meluri indang Deputy Commissioner tasenba Phuleshe K. Yephthomi aser ADC tasenba Shelly Katiry na metetpelaba mapang agia liasü.

Iba senden nung DC Meluri, Phuleshe K. Yephthomi-i Heads of Departments ajunga dang pei mapa bendanga agütsür züngzünga inyaktsü ayongzüka liasü.

District lenla ajunga nung aintsü aser terenlok atema department tem tsüngta amalitep

shidak akatsü aser külemi inyaktsü tongtipang lir ta pai ashi.

Deputy Commissioner-isa ketdangsurtem dang district jenjang ajungkettsü aser nüburtem tajungba nung tenzüksü mechi ochishia bendanga agütsür inyaktsü ajungmesoa liasü.

ADC Meluri, Shelly Katiry-ia Meluri district kübok Vibrant Village Programme nung temulung agütsütsü indang jembia liasü aser district ajungtsü atema sendaktepa aliba department ajunga dang amalitep akatsü aser sentong tasen yangluba nung shilem agitsü ayongzü.

Iba senden nung J.E (Power) Meluri, Nguvitho Katiry-i district nung terenlok maparen balala inyakba indang PowerPoint presentation agüja liasü.

ADC Kiphire ajanga metetdaksür

Dimapur, Monupii/May 12 (TYO): Ministry of Health and Family Welfare, Government of India nungi totuyuba agütsüba ama linük tesem ajunga nung May 16, 2026 nü "Community participation Dengue Control: Check, Clean and Cover" omen kübok National Dengue Day amungtsü, ta Addl. Deputy Commissioner & Administrator, Kiphire Town Council, Longdiba L Sangtam, NCS ajanga sangdong ka nung

metetdaksü. Iba anogomung ya pre-monsoon preparedness nung shilem ka ama lir, ta ashi.

Iba anogomung nungtem nung May 16, 2026 anepdang 6:00 ako nungi tenzüka dengue nungi kumzüka alitsü aser azüoktsü nükjidong nung Mass Social Work alitsü, anungji nüburtem, departments aser institutions ajunga shilem agitsü ayongzüker, ta sangdong ajangasa ashi.



Advisor, Youth Resources & Sports, S. Keoshu Yimchunger lenisüba kübok Deputy Commissioner, Shamator indang Conference Hall nung May 12, 2026 nü Shamator District Planning & Development Board senden amendang tangokba noksa ka yangi angur.



Nadia (West Bengal), May 12, 2026: Mongolbarnü International Nurses Day anogomong nung Nadia nung aliba hospital ka nung nurse temi Florence Nightingale nem akhüm agütsüba noksa nung angur.

Rajasthan nung NEET 'paper leak' asüba bushisüngdang tenzükogo

New Delhi, Monupii/May 12 (Agencies): May 3, 2026 anogo nung All-India medical undergraduate entrance exam agiogo, ajisüaka iba jakdang paper leak asü, ta tai tongloksüba nung ajemdaker iba tatidang thinen.

Rajasthan nung police-iba tatalokba bushisüngdang tenzükogo.

National Eligibility cum Entrance Test (Undergraduate) ketdangsüa agiba agency, National Testing Agency (NTA)-i, Rajasthan Police indang special operation group (SOG) kati bushisüngdangba report atadar, ta metetdaksü.

MBBS aser BDS courses atema admission agitsü asoshi candidate lakh 22 dak temai NEET-UG 2026 tatidang agüja liasü.

Osangbenertem den jembidang Rajasthan Police SOG additional director-general, Vishal Bansal-i, iba

tatidang agitsü anogo 15-30 jelia mobile phone ajanga kaketshirtem tsüingda "guess paper" ka prokshia liasü, ta metetdaksü.

Paisa, "guess paper" nungji tasüngdangba 410 shi liasü aser iba nungjagi tasüngdangba 120 bo test paper nung aliba tasüngdangbatem liasü, ta metetdaksü.

Bansal-i, tang tashi nungbo iba ken o dak sendakba nung shinga mapu, ta ashi.

NTA-i X ajanga, iba tatidangji lateta aliba anogo shidak nung agi aser security inyakim-a shidak benshia liasü, ta metetdaksü.

Question papers ji GPS ajanga 'track' asüba gari ajanga belena liasü, tatidang agiba halls nung AI-assisted CCTV liasü aser ibaji central control room nungi reprang; iba dak alia candidate shia biometric verification agi, ta NTA-i metetdaksü.

"Tatidang agiba sülen anogo pezünü lir May 7, 2026 aonung iba tatidang nung tim mesüi benshiba mapatem osang NTA nem metetdaksü. May 8 anepdang NTA-i iba osangji central agencies nem metetdaksü," ta NTA-i metetdaksü.

"Iba tatalokba ya tang bushisüngdangbar aser mapang shidak nung agencies-i osang metetdaksütsü. NTA-i iba bushisüngdangba dak sendakba nung kecha mejembitsü," ta parnokisa metetdaksü.

Lok Sabha nung Opposition lenir, Rahul Gandhi-i X ajanga, joko NEET ya tatidang ka masü saka 'auction' ka kümogo, ta aitsü.

Rahul Gandhi-isa, "Tesüiba küm 10 tsüingda paper leak asüba tatalokba 89 lir aser iba nungji ajemdaker tatidang 48 ben agishia liasü. Kaketshir million 2.2 tamang raksatsüogo," ta metetdaksü.

Bengal nung Ayushman Bharat scheme mapa kuma benoktsü

New Delhi, May 12 (Agencies): Tang West Bengal nung sorkar tasenbai state nung Ayushman Bharat scheme mapa kuma benoktsü atema telemtetba agiba atema Ato kilonser, Narendra Modi-i tenüngsang agütsü.

Modi-i, state nung BJP sorkar tasenbai Central indang tongtibang welfare schemes aika junga benoktsü, ta metetdaksü.

Hombarnü West Bengal Chief Minister Suwendu Adhikari-i, state nung Centre

indang health insurance scheme mapa kuma benoktsü, ta sangdonga liasü.

Iba scheme kübok küm shia temsüa alir kibongtem nem sen lakh 5 jenjang medical teyari agütsütsü.

Modi-i X ajanga, "West Bengal nung kü aianu aser adianutem atema inyaktsüji tongtibang! State nung nüburtemi alima nung healthcare scheme tulutiba Ayushman Bharat ajanga tajangzük agitetsü ta meteta ni

pelar," ta metetdaksü.

"Iba denji külemi gol ana aketba sorkari tongtibang Central schemes aika kanga junga benoktsü," ta paisa metetdaksü.

Tawa Bengal assembly election nung BJP-i Trinamool Congress madak takok ngua tang mezüing state nung BJP sorkar tentetogo.

BJP-i menden 294 nungi menden 207 tashi nung takok nguteta liasü aser TMC-ibo menden 80 nung dang takok angu.

Bihar Education Minister-i tetsürtemi shisaliok menüngdak ta jembiba

Patna, May 12 (Agencies): Tang Bihar nung education minister tasenba, Mithilesh Tiwari-i, tetsürtemi shisaliok menüngdak; tetsürtemji ki telung nung ang alitsüla, ta jembiba sülen aikati pai jembiba oji aitsüdar.

Mithilesh Tiwari ya Bihar nung Gopalganj district kübok Baikunthpur constituency nungi BJP MLA lir aser tang mezüing minister lir.

Hombarnü Tiwari-i jembiba oji social media nung kanga prokshio.

Osangbener kati, shisaliok angutsü atema tetsürtem dak temeden lir, ta ashiba langzua Tiwari-i, "Tetsürtemi parnok temedenji odang angutsü," ta ashi.

Mithilesh Tiwari ya tamalen tesayur inyaka liasü aser Economics nung BA (Honours) degree lir. Pai Patna nunga coaching institute ka lapoka liasü.

Mithilesh Tiwari-i jembiba oji Congress densema opposition party temi sashia aitsüogo.

Tiwari-i, "Shisaliok nüngdak mali. Asen kibongtem nung jalatemji tashi lir aser asen azükaru atema tamendakdak lir. Modi-i tetsürtem tashi atema inyaker, anungji kechiba jalatem kimai adoktsü?" ta ashi.

Congress lenir Srinivas BV-

i iba video ji lemsatapa, "Bihar nung Education Minister tasenba ajuruang... metzü metsütsü tamadok," ta ashi.

Rashtriya Janata Dal (RJD)-ia X ajanga, "Iba ya Bihar Education Minister Mithilesh Tiwari lir. Nitish Kumar-i küm 21 tsüingda Bihar nung tashitait shisaliok raksatsüogo aser tang Tiwari-i temenen aridokba aser külemküja ajanga shisaliok tajung agütsütsü," ta metetdaksü.

Taoba mapang Bihar Chief Minister, Nitish Kumar-ibo state nung tetsürtem atema shisaliok ajungketja liasü. Kumar-isa school-i aoer tetsürtem nem bicycles agütsü.

Iba dak alia Nitish Kumar-i 'poshak' yojna tenzüktsüba ajanga iba scheme kübok tetsürtem school uniform atema senotsü teyari agüja liasü.

1988 küm Tiwari-i ABVP nung aden aser 1990s mapang nung yimtenren nung ajemoka liasü. Bihar nung RJD yimsüsüba mapang 2005 küm February ita nung BJP-i pa candidate shima toktepdaksü saka tamakok ngua liasü.

2015 küm election nungbo pai takok ngua liasü aser 2020 elections nung takok mangu.

2025 küm election nung pai RJD candidate madak takok ngua liasü.



May 12, 2026 nü New York nung aliba UN headquarters nung 'From Shunya to Ananta (Zero to Infinity) - The Indian Civilization's Contribution to Mathematics' exhibition nung India External Affairs Minister, S Jaishankar-i jembidang tangokba noksa nung angur.

TN CM Vijay-i Congress lenirtem ajurutsü

Chennai, May 12 (Agencies): Bodhbar nikongdang Tamil Nadu Chief Minister, C Joseph Vijay-i Chennai nung TNCC headquarters semdanga Congress lenirtem ajurutsü.

May 13 nü assembly nung floor test agitsü lia Vijay-i Congress lenirtem ajurutsü.

Mongolbarnü Congress party otongdar A Gopanna-i sangdong ka ajanga, "Vijay-i TNCC Tir K Selvaperunthagai, Tamil Nadu atema AICC in-charge Girish Chodankar, AICC secretaries Suraj Hegde aser Nivedith Alva na aser Congress party Legislative lenir, S Rajeshkumar nung party headquarters- Sathyamurthy Bhavan nung ajurutsü," ta

metetdaksü.

Kasa senden nungji taoba mapang Tamil Nadu Congress unit nung Tir inyaka arurtem, taoba mapang Central minister tem, party MLA tem aser party nung lenir taintem-a alitsü, ta paisa metetdaksü.

Secretariat osang ajanga ashiba agi, Vijay-i VCK Tir, Thol Thirumavalavan aser Indian Union Muslim League (IMUL) lenirtem-a ajurutsü.

Hombarnü Chief Minister Joseph Vijay-i taoba Chief Minister aser DMK Tir, MK Stalin-a ajurua liasü. Vijay-isa MDMK tentetsang Vaiko, PMK tongti lenir aser Anbumani Ramadoss aser Tamil nationalist party, NTK tongti lenir, Seeman nungera ajuruogo.



New Delhi, May 12, 2026: Paper leak asüba ajanga NEET-UG 2026 exam thinenba atema New Delhi nung National Students' Union of India (NSUI) züngsemtemi National Testing Agency (NTA) anema longkak aitba noksa nung angur.



TIR YIMYIM

YIMOBILEM (EDITRIAL)

DIMAPUR WEDNESDAY, MAY (MONUPII) 13, 2026

Temzüng ozüng metetba senso

Tajangshir aser tangateteremi ashir, temetetbaji tashi, Knowledge is Power. Tetezüji, chiyongtsü achiba agi temang nung tashi arua mapa tasaka melamelaa inyaktet ama, asenok dak temetetba aliba agi asenok tashi aser tasü itdaktsür. Aji oda, tanü putu nung senso shia asoshi nungdak tulutibaji pei taküm junga lia otettsüsa mapa inyakba nungi tenzüka pei yimten aser pei linük temzüng ozüng meteta alitsübaji asütsü. Iba tangatetba nung yashi Mokochung nung Ao Sendeni ayongzüka India temzüng arla 371(A) aser Nagaland Village & Area Council Act 1978 indang shisatokden sentong alibaji, talisa, yimtak yimtsüngtem nung Village Council nung alir yimsüsürtem tashi itshidaktsüba sentong ka asütsü. Atangji, Nagaland Village Council Act nung Village Council ta aliba ya asen Ao lima yimtsüngtem nung Chungliyimti shilang alanga putu ait nung yimsüsür tatartem menden masü saka state government-i iba Village Council Act ajanga küm pungo atema shimba yimten yimsüsüba menden lir. Anungji, Village council ta asüba ya putu menden ta meyipa amshiaka, asenok angatettsübaji iba putu menden yabo Chungliyimti nung alangtetba putu menden to masü. Ajisüaka, Chungliyimti shilang nung amentetba putu menden nung tatartem nungiang Village Council nung züngsemtemjia shimer. Aji oda, state government-i Village Council Act lateta Nagaland nung yimtsüng shia Village Council alitsü latettsüba ozüng ya Aor putu menden yimsüsübaren ajizüka latetba yimten yimsüsübaren ka lir. Iba Village Council Act yagi Village Council nem pei pei yimtsüng nung Council-ji local self government ama kümer nübertem asoshi terenlok mapa inyaktetsü aser teti state government senpong nungi senotsü angutsü imlaa melii, peisasa senotsü bushia terenlok mapa inyaktetsü asoshi tashi aser temeten agüja lir. Anungji kodang Village Council purtemi Village Council Act nung parnok nem tashi aser temeten agüja alibaji jungjunga metetdir, idangji Village Council-ji par MLA dangbo tashi taitba asütsü, kechiyong MLA-bai parnok shim masü saka parnokiang MLA-bai shim. Aji oda, par yimtakbo terenlok mapatem ajak MLA-bai mulungba nung masü saka Village Council-i mulungba nung inyaktetsü. Iba amaji inyakba ajanga MLA tashi ajemer masü saka mapa nung ayongayonga akümer aser senotsü shitak amshia terenlok mapa shitak inyakteter. Atangji, Village Council nung alir yimsüsürtemjia pei mulungba nung telemtetba agia inyaker masü saka yimtak alir nütsüng-nübo, sarudoker mulungba nung terenlok mapatem sentong yanglua aor. Aor putu menden yimsüsüba nung topur ajungji aji lir, kechiyong tatar yimsüsüri pei sünütsü süa yimsü süra jangkudokeri saru magütsütsü. Ibayongji, Democracy shitakbaji Aor putu menden inyakyim nung lir ta jembir. Ibai dang masü saka Naga nungger tia ajung kaji, Naga yimten nüchiso jenjang ka mengutetaka, India telungjem kübok jenjang balaka nung alitsüsa India temzüng arla 371 (A) nung India tatar Hoho-ia metangshitetsüsa Naga nungger sobaliba, tamangba yimsü, obendangba aser ali rongsen madak kibur akümba temeten agütsüba ya Naga nungger asoshi tashi tuluka asütsü. Ajisüaka, asenoki asen nem agütsüba tashi aser temetenji memetetra, iba jagi asenok meyaritetsü, anungji asenoki item temzüng ozüngtem jagi asenok asoshi kechi inyaktetsür aser asenokia kechi inyaktetsüla ta asüba nungdaktemji metettsüla. Atangji, linük temzüng arla 371(A) aser Village Council Act amaji asenoki meteta, government nung alirtemia yimsü sütetra aser nübertemia pei ajangzüksüsa inyaktetra, asen lima ya "Independent" lima ka asütsü.

OLEMSABANG

SHILUNOKTAK - TAOCHI AENLENMANG

~ O. Tongpang Jamir

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

(Yashi adok nungi...)

Telangzüba : Tulus, nai kanga aroka shisadangtsüla asüngdangba asoshi pelar. Ni asoshi Shipurajem ya meimchir koda aor mesüra tepila shisadangba kija dangbo masü. Ibai meimchir ka pei sobaliba nung akhüm aser shilunoktak nung rangloktetbaji lir. Iba yagi kü tamang nung metsükteper saka ano shisadangba nung taliang tashi-itshidaktsür. Tsüngremer taochi agi ni teraksa kibong ka nungi ajungket, aser nübertemji tebilemtsü/khuret ta masü saka otsütem renloka odaktsür ta ngutettsü tashi ain agütsü. Ni kodang lokti ka indang shisadanger, Tsüngremi ni khuret agi neneter aliba nungi toburjunga molutettsüba ama itemji tsükdangradang agi mekütbanger aliba nungi kanga dang toburjunga ajungketba angur. Anungji, tsükteptsüba masü saka kü tamang agi meimchir den temeim aser akhümstübutep agi tongteptsü, aser ibajia Shipurajem nung tongtibangtiba jenjang ka lir.

Tasüngdangba Tanabuba : Ne shisaluyim indang kulikaket kodang reprangdangdir, kanga dang tajungtem rongnunga tajungtiba nung ajangteta atuba angur, saka shisatsü kija agi tesayur tajung ka mekümtet. Shipurajem lu nung shisaliok tajungtiba tesayur ka akümtsübaji naia kechi ajanga ta shiteter?

Telangzüba : Tesayur tajung kaji shisatsü belenzüka sayuba kijaji dangbo masü, saka shibai tejen tangatetba nungi lenmang tasen papoka tugutetba indang agi jangradaktsür ibaji lir. Iba jenjangji taremsük aser temeim ajanga arur ta ni ajangshiogo. Shisaluyimba mapa ajak toktsütsü tashia ni ajuruogo, saka Tsüngrem taochi agi ni shilunoktakdaktsü. Iba kasa taochi jagi nia sayutsü tejangraba lir, bushinütsü asoshi ajungmesotsü, kaketsür ka dak shilunoktaktsü tanglokdaktsütsü, aser tasüngdangba mechimenua sang tulua sang ajakji tongtibang ta parnok dang jilanemshitsü (reminds). Shipurajemji nisung indang, aser nisungtemi parnok dak kodang jenjang keta bilemer idangji tajungtibaji angazüker.

Kanga tatayuyua saka Tsüngrem dak metaloker iba tatidang agütsür yongyasetta aliba mapang, NPSC kübok Assistant Professor of Anthropology asütsü shimtetogo ta osang aru. Iba tetoktepba ya lenmang kangasa tasak liasü, saka la tamang agi inyakba nung süngjang tajung atang. Iba takok ya la mapa anguba kija dangbo masü saka ibai lar kibong teraksa madak lai tamang agi Tsüngrem den jajaba taküm kuli ta jangjar.

Tapu Pungu Taochi molutetba

Mapang süia aodang, Taochibenla mulungjang ano talila anüka aküm, aser ibaji tenu asoshi liasü. Tenu shiba tebui tangar tetsür ka den kitachir ka sodaktsü, ya oda lai tenu chichiba ka ama onsara sakloka kümadok. Tamasabo ibai külakoktsüba jabaso ta tetshia liasü saka tanemtanemi iba tanubosang ajanga temeim tali tesentaktepba aser tebushitetba aika ngutet. Pa mapa ajak nung lai yari, shisaluyimba mapa ajak nung lai sayua intetdaktsü. Lenmang ajak nung lai tenu chichiba ama züngshi. Pa homework inyakba ajak nung lai yari. Pa den mapang shia anogodoka asaya-a amungtsüji lai kanga jangra-a liasü, adangji paia teyi kanga peladaktsü. Aser mapang aben lai Tsüngrem tenüngsanga ashi, "chichiba temeimi maaksü ajak akoker." Ina atudang iba tanubosanga ya-a tokolok tajung asünung Secondary, Higher Secondary aser College ajak nung takok tajungtiba angur rongnung adenba ajanga ano lai kangasa meima aküm.

Tena tesentaktep onsara akanga aküm, aser mapang aben lai tenu dangji Tsüngrem O tajung sayuba den teti Tsüngrem tsüba alitsü sayu, yamaji paia oyala chichiba ka ama tashi angaba tanur süa intet. Pa sayu achiba tanur ka asünung sobaliba nunga takang, yamaji lokti balala nung shilem agia ain. Aser lokti yanglushiba mapa jenti nung pa lenir sür takok aika angu. Koba mapang kabo teraksa aser mulungzürepa tenzük saka taremsük agi puteptetba otsü kümadok.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chhattisgarh state nung Khristan kibong ka dak azük



May 09, 2026 nü Chhattisgarh nung Kondagaon district kübok Madgaon yimdak Khristan kibong ka dak azükba sülen parnok hospital nung amongdang tangokba noksa nung angur.

May 12, 2026: Chhattisgarh state nung Khristan kibong ka dak azük aser yimdak nungi aridoktsü amokmeren, ta Progressive Christian Alliance (PCA)-i metetdaksü.

May 9, 2026 nü Kondagaon district kübok Madgaon yimdak Khristan kibong jagi par lu nung titi aongbaji nisung anati ashishia liasü.

Yimdaklir ana jagi Khristan kibong dangji, nenok yimdak alitsü temeden mali, kechiyong nenoki Khristan yimsü agizük ta ashi, ta Pastor Simon Digbal Tand-i metetdaksü.

May 11 nü osangbenertem den jembidang PCA coordinator, pastor Tand-i, "Khristan kibong nung jagi züngsem pongu kanga mejungi yiru; kar tekolak yiru aser kar teka sükdang. Tang parnok hospital ka nung

treatment tagidak," ta metetdaksü.

Tesüiba ita ishika yimdaklirtem jagi Khristan kibongji amokmerena arur. Yimdak senden nung parnok mezüngmeshir aser Khristan yimsü tokjang ta rongshir.

Khristan kibong jagi Dhanora Police Station nung tashishiba ken o agütsütsü merang, ajisüaka police-i ken o mebenok.

Khristan kibong dak azükba sülen pastor tem network PCA den lokti lenir kari police dang Khristan kibong nemji security agüjang, medical teyari agüjang aser aibelenertem anema ken o benokang, ta mepishio.

Taküm March ita nung Chhattisgarh State Assembly nung anti-conversion ozüing tesashiba yanglua agizük aser April 7 nü state Angh, Ramen

Deka-i sign asüba sülen ozüing kümogo.

Pastor Tand-i, ozüing tasenba agizükba sülen nungi Khristantem anema inyakba kanga bulua kümogo, ta metetdaksü.

May 10 nü Hindu Jagran Manch (Forum for Hindu Awakening) züngsemtemi Dhamtari district nung tekülem sentong tagidak mapang Tenla ki trok mita ao aser Khristantem amokmerena liasü.

Pastor-i, "Anogo shia amai onoki item ama tatalokba osang angashir. Iba ya ajanga yimtsüngtem nung Khristantem kanga shisabulur," ta metetdaksü.

May 11 nü osangbener den jembidang Rashtriya Christian Morcha (national Christian forum) Tir, Kamal Kujur-i, anogo shia amai Khristantem anema inyakba osang angashir, ta ashi.

2024 küm Chhattisgarh nung Khristantem anema inyakba tatalokba 165 liasü.

2024 küm India nung Khristantem anema inyakba tatalokba teimba aliba state ji Uttar Pradesh liasü, iba sülen tanabuba jenjang nung Chhattisgarh liasü, ta United Christian Forum-i metetdaksü.

Nütsüing million 30 aliba Chhattisgarh state nung nütsüing shilem 2 dang Khristantem lir.

Mari kürakyanglu nem moko mangumdaksür sepai ka tepuokdak ayutsü



Lebanon nung Israel sepai kati Mari kürakyanglu nem moko mangumdaksüba noksa nung angur.

May 12, 2026: Lebanon nung Israel Defence Force (IDF) sepai kati tasüngtet Mari kürakyanglu mezüngmeshiba atema pa anogo 21 tepuokdak ayutsü tetuyuba agütsüogo.

Iba dak alia item tatalokba video tangokba atema Israel sepai kata anogo 14 tepuokdak ayutsü, ta Hombarnü IDF-i metetdaksü.

Bodhbarnü osangbener den jembidang IDF-i, Lebanon nung aliba Debel yimdak Mari kürakyanglu tebang nung Israel sepai kati moko (cigarette) mangumdaksüba ya hopta ishika tejaklen ataloka liasü, ta metetdaksü.

temeden aser tekülem temeden akhümtsübur, ta metetdaksü.

Taküm April 19 nüa Israel sepai kati Lebanon nung Yisu Khrista kürakyanglu raksaja liasü.

Lebanon kübok Debel ya Maronite Khristan yimtsüng ka lir. Iba yim ya Israel arrtsülen nungi kilometer 5 shi dang pilar lir.

April ita nung IDF-isa Yisu kürakyanglu raksatsür sepai ka anogo 30 nü tepuokdak ayutsü tuyua liasü.

Israel sepaitemi kürakyangluji tasen ka yutsütsü asüngdang, ajisüaka yimdaklirtemi magizük.

Israel sepaitemi solar panels aika raksaja liasü, iba sülen iba tatalokbaji bushisüngdang tenzüokgo.

Israel-i Lebanon nung Hezbollah telok anema raradang yimsü dak sendakba tesemtem aser Khristantem amakba tatalokba aika lir.

2024 küm January ita nungi 2025 küm September ita tashi nung Israel nung Khristantem anema inyakba tatalokba 201 liasü, ta Religious Freedom Data Centre-i metetdaksü.

Israel nung Khristantem anema inyakba tatalokbatemji teimbaka Orthodox Yihuda nungertem ajanga lir, ta parnokisa metetdaksü.

ANOGO ABEN TSÜNGREM DEN

Alima tatem tashi

Kodang nenok dangi Tanela Temeshi arudir, nenoki ain agizüktsü aser Yirusalem nung, Yihuda nung aser Samaria nung aser alima tatem tashi nenoki Kü kuli asütsü. - T. Mapa 1:8.

Asenoki Yirusalem, Yihuda, Samaria asen alidak, aser alima tatem tashi Yisu kuli asütsü asoshi Pai asenok yok. Kolen alimaji tilaba akümer. Alima rangben yimtsüng ka ama akümer. Ghonda ishika tsüngda alima ajunga longa aotsü akoker. Network ajanga alima kinük külen kechi ataloker, kinük külen indangjia metetadoker.

Saka ano alimaji tuluba akümer. Küm 50 shi süiogo alima nütsüng yongsük billion 2 dang liasü. Tanü billion 5 dak tali ta temetettertemi ashir. Aser shilem pezüsü kuma lemsar shilem kati dang Yisuji pei Kümtetdakba aser Kibur ta agizuka lir: Khristantemi Yisu Khrista Pa kangki indanga sangdongtsüba o asenok den alir, aser aseni kodanga majuruba aser majurutsüba pur dang ashitsübaji asen taküm nung shilem ka asütsüla. Yisui ashi, "Nenok kü kulitem lir". Khristan shia Yisu temeim lemsateptsü asoshi Tanela Temeshi ain agi süngtsür. Iba ain nung kidang, kiyonger dang aser alima ajunga nung kuli asütsüla.

Trump aser Xi na ajuruba sülen Pastor Ezra Jin chioktsü imlar



Pastor Ezra Jin' aser par jala, Grace Jin Drexel

May 12, 2026: China nung ketdangsertemi house church Pastor, Ezra Jin aser Hong Kong nung journalist Jimmy Lai na pua tepuokdak yua lir, ajisüaka parnok chirnurtemi tan hopta US Tir Donald Trump-i Beijing nung China Tir, Xi Jinping ajurua senden amenba mapang nung iba atemaji jembiba sülen tena chioktsü imlar.

Zion Church tentetsang Pastor Ezra Jin'er jala, Grace Jin Drexel-i, Trump-i lar kibong dang Xi den senden amentsü lia pai tebu atema jembitsü ta shiogo, ta metetdaksü.

"Anogo ana tejaklen Tiri senden metenzükdang kübu atema jembitsü ta shiogo, aser ibaji ajanga onok pelar aser teimla akar," ta Grace-i metetdaksü.

Arrshi küm 56 Jin Mingri-a yaküm October ita nung Beihai, Guangxi Province nung par kidang lia sorkar ketdangsertemi pua liasü.

Yaküm October ita nungsa Beijing, Shanghai aser Shenzhen nung Zion Church nung lenirtem aser züngsemtem parnok 30 shi pua liasü.

Jin densema nisung 18 shi Beihai nung aliba detention

center nung puoka lir, ta taküm March ita nung osang ka ajanga metetdakja liasü.

Grace Jin kinüingbu Bill Drexel-i, tamalen Khristantem atema ken o jembitsür lawyer tem ajak dang iba ken o nung shilem magitsü ketdangsertemi rongshia liasü, ta metetdaksü.

Jin ya California nung aliba Fuller Theological Seminary nung azüingba sülen 2007 küm pai China nung Zion Church ya tenteta liasü.

1989 küm Tiananmen Square nung longkak aitba nung pai shilem agiba sülen pai Khristan yimsü agizük aser China nung house church movement nung pa ya tongti lenirtem rongnung ka lir.

Zion Church ya China nung underground Protestant Arogo tulutiba aküm, ajisüaka 2018 küm sorkar ketdangsertemi iba Tenla ki shibangtsüba sülen tangbo Arogoi online ajanga dang tekülem sentong agir. Zoom, YouTube aser WeChat ajanga iba tekülem sentong nung nisung 10,000 dak tali adener.

2018 küm nungi Pastor Jin kinüingtsübo U.S nung alir aser tena chir asemprongla America nung nungersensotem lir

AO OSHI ANGAZÜKDAK:

TANÜ ANGAZÜKTSÜBA OJANG



Yarem

(n) alu runger külen süngtoklitok tilateri anungba (debris after jhum burning)

* Alu azüba mapang yarem ajak jungjunga shishia endoker.

Yaret

(v) mapang talangka shirangba (prolonged illness)

* Oboula mapang talangka yaret saka anep.

OLONG PAITEP # 7502

15x15 crossword grid with numbers 1-17 indicating starting positions for words.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S ___ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 7501 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü,
5. Lenti, 7. Tajangzük,
11. Teronem, 12. Sempa,
13. Jahaz.

NAI-A YA METETTER



Armenia nunger composer & musician Ara Gevorgyan aser "1000 Vahan" educational, cultural, and charitable foundation ajanga Guinness World Record ka yangluogo. Parnoki "Revival" ta ser sentong ka agidang Armenia nunger tanur aser lanurtem anidena dhol drums 1,000 aser tsüngsanger nisung 400 shilem agiba ajanga otsü tasen ka yangluogo.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tangkhul Naga yimtsüngtem amakba aitsür: Meitei Alliance



Imphal, May 12, 2026

(Agencies): May 7, 2026 nü Manipur kübok Kamjong district nung Tangkhul Naga yimtsüng asem amakba aitsür ta Meitei Alliance-i metetdaksüogo.

Myanmar nung amenoka aliba Kuki telungpur teloktemi prangpong tajung, tapoktsü aser drone-assisted warfare amshia amak ta parnoki tai tongloksür.

Kuki National Army-Burma (KNA-B) aser Myanmar nung tanga telungpurtemi anepongi Choro, Wanglee, aser Namlee yimtsüngtem amak ta Meitei Alliance-i metetdaksü.

Telungpurtemi international

border adena aru aser civilian alidak amak. Iba mapang ki 18 shi ka nung mi senoktsü, osettsüset auya bener ao aser civilians pur ao ta Meitei Alliance-i ashi.

"Iba ya tai maketba civilians anema kiralongraba inyakyim ka lir. Manipur nung tensa tamajungba akümba atema tebilemtsü abener. Yimdaklir dak drone bombings, rocket launchers, aser small arms amshia amakba ya sorkar atema security tayongzükba tulu ka lir" ta Meitei Alliance-isa ashi.

Iba inyakyim ajanga Tangkhul Naga nunger dang masü saka Manipur nung

yimjung, security aser territorial integrity nung kongshir ta parnokisa ashi.

India aser Myanmar nungi telungpurtemi maneni inyaksangshir aser iba ajanga civilian temi Suspension of Operations (SoO) framework inyakyim nung tebilemtsü adoker ta parnokisa metetdaksüogo.

Central aser State sorkartemi May 7 nü iba mapa inyaktertem maitüsü jangjatsüla aser ozüng tapet agi merenshitsu. Iba tatalokba atema jungjunga bushisüngdang asütsüla ta Meitei Alliance-isa ayongzükogo.

Choro, Wanglee, aser Namlee nung aliba Tangkhul Naga nunger den külemi noktaker aser Manipur nung teti atema yimjung bener arutsü atema takoksa ajurur nem temeten agütsütsüla, civilians kümzüka ayutsüla aser telungpur networks anema mapa tuluba inyaksüla ta Meitei Alliance-isa metetdaksüogo.

Manipur nung AR-i bunkers 16 raksatsü, telungpur 5 apu

Imphal, May 12, 2026

(Agencies): Assam Rifles-i Manipur Police aser tanga security agencies den yaritepa Manipur kübok intelligence-based operations agia arudar.

Item operations agia arudang Ukhrlul aser Kamjong district tem nung bunkers 16 raksatsüogo ta defence sangdong ka nung ashi.

Deobarnü ozünggi noktanga aliba KCP (Apunba) nung Sergeant Major ka apu. Pa ya fighting commander ka ama inyaka liasü aser Thoubal district nung Kakching Commandos aser Manipur Police joint operation ka nung apu.

Taoba hopta tsüngda KYKL, KCP (PSC), PREPAK (PRO), KYKL (SOREPA), aser KCP

(Apunba) züngsem pungu den prangpong-injangtem puogo.

Telungpurtem ket nungi sub-machine gun carbine, bolt-action rifles, 9mm pistol, single-barrel 12-bore gun, aser injangtem ngutetogo.

Sepaitemisa mobile phones, SIM cards, Aadhaar cards, camouflage uniforms, aser Rs 6.81 lakh ngutetogo.

DEBTS RECOVERY TRIBUNAL GUWAHATI

Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati-781007 (Assam)

Exh.No.: 6092

Case No. : OA/98/2026

Summons under sub-section (4) of section 19 of the act, read with sub-rule (2A) of rule 5 of the Debt Recovery Tribunal (Procedure) Rules, 1993.

STATE BANK OF INDIA

VS

MESSERS LOVELY CENTRE & Anr

To,

(1) M/S LOVELY CENTRE

Prop: VIJAY JAGTIANI NST Building , I.M Road, Sangtemla Ward, District – Mokokchung, Nagaland -798601

(2)MR. VIJAY JAGTIANI Prop: M/S LOVELY CENTRE Son of Late Anand Jagtiani, House No. 182 Block II, Sangtemla N.S.T. Building, District – Mokokchung, Nagaland -798601

SUMMONS

WHEREAS, OA/98/2026 was listed before Hon'ble Presiding Officer/Registrar on 29/04/2026. WHEREAS this Hon'ble Tribunal is pleased to issue summon/notice on the said Application under section 19 (4) of the Act, (OA) filed against you for recovery of debts of Rs. 2595128.78/- (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under:-

(i) To show cause within thirty days of the service of summons- Publication There of as to why relief prayed for should not be granted;

(ii) To disclose particulars of properties or assets other than properties and assets specified by the applicant under serial number 3A of the original applications;

(iii) You are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;

(iv) You shall not transfer by way of sale, lease or otherwise, except in the ordinary course of his business any of the assets over which security interest is created and/or other assets and properties specified or disclosed under serial number 3A of the original application without the prior approval of the Tribunal;

(v) You shall be liable to account for the sale proceeds realised by the sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before Registrar on 15/06/2026 at 10:30 A.M. failing which the application shall be heard and decided in your absence.

For Paper Book follow the following Url:https://cis.drt.gov.in/drtlive/paperbook.php?ri=2026345680226 Given under my hand and the seal of this Tribunal on this date: 02/05/2026.

Note: Strike out whichever is not applicable.

Signature of the Officer Authorised to issue summons. Registrar, Debts Recovery Tribunal GUWAHATI

Nigeria-i Zamfara market nung tayimtsü amshia amakdang nisung 100 tepset

Bauchi, Monupii/May 12 (Agencies): Nigeria mitkari northwest Zamfara state kübok nisung jenti aliba shishilempaba tesem ka nung tayimtsü amshia amakdang civilian 100 tepset ta Amnesty International ajanga Mongulbarnü ashi aser ketdangsürtem dang tangsa bushisüngdang tenzükang ta ajungshir.

Deobarnü Zurmi district kübok tezülen Tumfa market nung tayimtsü amshia amakba ya ita ka tsüngta Nigeria north len nisung mesemi aliba shishilempaba tesem nung tanaben amakba alitsü.

Iba lendong nung yiruba nisung aika Zurmi aser anasa Shinkafi nung aliba mozüki tem

nung anepalutar aser iba lendong nung asüba nisung aika tetsürtem liasü, ta Amnesty ajanga ashir.

Nigeria mitkari telangzüba agüja mali saka taoba mapang civilian dak tenük meyok ta shia aru aser itdangiter-i ashiba ama tayimtsü amshia amaker aser telungpur alidak kisung amaker ta ashir.

Tenük kuli alirtemi Amnesty dang ashiba agi, mitkar indang tayimtsütem iba tesem meketa anüngdang teroto mapang senzüa liasü aser ghonda ana shi lir meyipa shilanga nisung tasung aliba market nung amak.

April ita nunga Nigeria northeast tsütsü Jilli nung aliba weekly market ka nung iba mesük

tayimtsü amshia amakdang civilian 200 shi tepseta liasü. Mitkar temi iba lendong asoshi bushisüngdang tenzüka lir.

Linük north tsütsü alirtem mitkari amakba ajanga civilian tem asüba asoshi tebilemstü tali akar ta ashir.

Nigeria mitkar ya linük northwest tsütsü banditry anema rara arur aser northeast nunga küm 17 tashi Islamist tebilemstü lir. Taoba küm Christmas mapang United States-i northwestern Nigeria nung Islamist aliba tesem tem amak, koba Nigeria-i Khristanpur kumzüka meyuteter ta Tir Donald Trump-i aitsüba sülen amakba alitsü.

"Iba ama nisung meimchir

temeden nung aibelenba ya yimya ka ama akumer, kong telungpur, bandits aser mitkar temi tashiyim amshiba nung yimdaklir tem ang tim atemer,"

ta Amnesty ajanga ashi. Parnoki tayimtsü amshia amakba ya ozüng agi memelar aser civilian takum mezüngshiba sayur, ta ashir.

TENÜNGSANG AGÜTSÜR



Merangkong Senso Jamir Kidong Telongjem Mendenti ajanga Wb. Mangyangtemjen Jamir aser Wt. Rongsenlemla tena jala **Kr. Dr. Imyanglula Jamitsür** lai **Doctor of Philosophy (Ph.D) in Agricultural Engineering & Technology** nung takok nguteta yimer yimsanger nem konang nüngsang bener arutsü nung kanga pelaa tenüngsang tulu agütsür. Nü sempet tajung sensosanger asoshi ajungketa amshiangma aser Tsüngrem temoatsü teti nü den lidakjangma.

Sd/-
JONGPONGYANGER
(President)

Sd/-
TIAWAPANG
(Gen. Secretary)

ALI AYOKER

Aoyimkum, Mozuki Mepu, Health and Wellness Centre
anasa Ali Bigha 3 ayoker. @350/- per sqft.
(Negotiable and No Broker). Contact - +918787378356.

ALIAYOKTSÜ LIR

Anitet Colony, Sector 2, Lane 2, Lengrijan, Dimapur nung ali ka tayoktsü lir.
Tasazük : Lenden 45x45
Metong 114x92
Ajak agi 4,635 sq.ft.
Jenang : Rs. 800/sqft
Contact : 9856546175

Pakistan: Khyber Pakhtunkhwa shishilempadak nisung 9 pokset

Khyber Pakhtunkhwa, Monupii/May 12 (Agencies): Mongulbarnü Pakistan northwest tsütsü nisung aika aliba shishilempadak tesem ka nung bomb tesashi apokba ajanga nisung toku asü aser aika yiru ta ketdangsürtemi ashir. Iba lendong ya Khyber Pakhtunkhwa nung aliba Naurang Bazar nung atalok, koba kanga mazüngi aliba shishilempadak tesem ka lir aser town square nung shilem ka lir.

Iba tesem nung tangokba noksa aser video tem nung dokan tem raksar aliba aser gari aika poksar aliba nguogo.

Emergency response agency Rescue 1122 ajanga ashiba agi, iba lendong nung nisung 30 shi yiru. Yirur alir ya aika anasa Bannu district nung aliba mozüki balala nung bener oa anepaluba mapang lir.

THQ Hospital nung medical superintendent Mohammad Ishaq-i ashiba agi, iba lendong atalokba sülen par mozü kidangi nisung 37 anir aru. Yirur alirtem karbo takum kumzüktsü teimla

kangabo mali ta pai ashi.

Emergency workers temi maneni rescue operations agir aser security ketdangsür temi iba tesem asadanga mapang lir.

Iba lendong ya ajanga region nung security tebilemstü tamajungba akumba tebilemstü ano tali akumer.

Anada Bannu district nung Honibarnü ang lendong tuluka ataloker lia Mongulbarnü shishilempada tesem nung bomb pokloktüsü ya ataloker.

Iba lendong nungya gari ka nung bomb inoker pokdaksü aser iba sülen police post ka amakba mapang police officers 15 asü. Pakistan ketdangsürtemi iba lendong asoshi Afghanistan nung aliba telungpurtem tenüng asen.

Iba lendong atalokba sülen Islamabad-i Kabul nung Taliban-i anir aliba sorkar anema longkak aita liasü.

Hombarnü Afghan Taliban sorkari Pakistan-i tai tongloktüsü nung tangbo telangzüba agütsüsü mali ta ashi.

Ita ishika linük ana tsüngta

tesendaktem mejungi arur. February ita Pakistan aser Afghanistan tsüngta rara tesashiba ajangshiogo, kong Islamabad-i Afghanistan telung nung tayimtsü amshia amak.

Pakistan-i iba mapang par linük anema amakba nung amshiba telungpur atsükokdak tesemtem nung tenük yoker amak ta shia liasü.

Ajisüaka Taliban sorkari telungpur mejenokdaksür ta ashir aser Pakistan telung nung telungpur tebilemstü ya Islamabad asoshi par tebilemstü lir ta ashir.

Tang tesüsa shishilempadak tesem nung iba lendong atalokba ajanga kidanger linük ana tsüngta tensa tamajungba akumtsü südi ta tetsübo tali aiddaksür.

Pakistan northwest tsütsü, talisa Afghan den arütsü anasa tesemtem nung security tebilemstü maneni tuluba akumer, kong telungpur temi amakba tang tali akumer.

Iran den ceasefire ya 'life support' nung lir: Trump

Washington, Monupii/May 12 (Agencies): Rara tembangtsü atema US-i proposal ka agütsüba Tehran-i magizüki takhangba kar agütsüba ajanga US Tir Donald Trump-i Iran den ceasefire ya "life support" nung lir ta Mongulbarnü ashiba sülen Iran den yimjung tezüngzüktep ka yanglutsü teimla samaa aor.

Iran-i Lebanon densema tesem ajungalen rara tembangtsü akhanger. Lebanon nungya US tembar Israel-i Hezbollah mitkar den rarar, shirnok Iran-i yarir. Tehran-i Strait of Hormuz ya par meyong ta nenshia ashi, rara mapang raksatsüba atema compensation meshir aser US naval blockade tembangtsü ashir.

Trump-i ashiba agi, Iran telangzüba yagi April 7 nü sangdongba ceasefire jenjang nung tetsükdaksü agütsür.

"Parnoki yokba jana azüngba sülen ibai (ceasefire) tang tashi maitba lir. Ni tembanga mazüng," ta Trump-i osangbener dang ashi, shibai ceasefire tembangtsü aiben jembia arur. Iran indang nuclear sentong densema mangatettep aliba onüktem indang jembishinü metenzükdang rara tembangtsü US-i tebilemba lemsatepa liasü.

February 28 nü rara metenzükdang alima nung totzü aser liquefied natural gas shilem 20 shi Strait of Hormuz ya ajanga bena liasü, saka rara ajanga iba tesem ajunga amai shibanga totzü atsürtemi totzü ayokba ajema kumogo.

Kasa mapang Iran ketdangsür temi sangdong balala agütsüba nung parnok maneni temlungtetba tulu nung aliba angateter. Islamic Revolutionary Guard Corps Navy indang deputy political director Mohammad Akbarzadeh-i sangdong ka nung, Iran-i Strait of Hormuz teratet ulushia sentong tasenba kübok "vast operational area" ta shia lir, ta ashi.

Iran ketdangsür nungi Akbarzadeh-i jembiba nung telangzüba kecha agüja mali, shibai iba tzü lenmang ya anüdoklen Jask yimti tzükum nungi anüolen Siri Island tashi lir ta ashir.

Iran parliamentary national security and foreign policy commission odongtar Ebrahim Rezaei-i X post ka nung, Iran dak ano khen dang makra onoki uranium enrichment ya 90% purity tashi yanglutsü ta ashi, koba nok-nü nung amshitetba jenjang ta züngshir.

Tehran indang mitkar aser nuclear sentongtem nung senotsü teyari agütsüba anendaktsütsü merangba nung shilem ka ama China dangi Iran nung rong aoba nung yariba nisung kija aser company tem dak United States-i Hombarnü sanctions tasen agütsüogo aser banks tem dang tang tazüokba agüja aliba nungi majentsü tekumdangtsü ashi.

Trump ya Bodhbarnü Beijing tonga arutsü imlar, kong China Tir Xi Jinping den Iran indang onüka jembitsü imlar.



क्षेत्रीय शिक्षा संस्थान, भुवनेश्वर
REGIONAL INSTITUTE OF EDUCATION, BHUBANESWAR
(National Council of Educational Research & Training)
Sachivalaya Marg, Bhubaneswar - 751022

Advt. No: 546

Dated: 11/05/2026

Admission to Various Teacher Education Programmes of Regional Institutes of Education

The National Council of Educational Research and Training (NCERT), New Delhi is an autonomous organization set up in 1961 by the Government of India, Ministry of Education to assist and advise the Central and State Governments on policies and programmes for qualitative improvement in school education and teacher education. The nine constituent units of NCERT located in different parts of the country, include: (i) RIE, Ajmer, (ii) RIE, Bhopal, (iii) RIE, Bhubaneswar, (iv) RIE, Mysuru, (v) NERIE, Shillong, (vi) RIE, Nellore (vii) NIE, New Delhi, (viii) CIET, New Delhi and (ix) PSSCIVE, Bhopal.

Applications are invited on-line from the eligible applicants for admission into various Teacher Education Programmes, viz., (i) Integrated M.Sc.Ed. (6-Year), (ii) B.Ed. (2-Year), (iii) Integrated B.Ed.-M.Ed. (3-Year), (iv) M.A. in Education Technology (2 Year) and (v) M.Ed. (2-Year) run under Regional Institutes of Education. The on-line application form is available w.e.f. 15/05/2026 to 05/06/2026 at www.cee.ncert.gov.in Common Entrance Examination (CEE) will be conducted at various centres across the country on 28th June, 2026. For details, visit our URL: <https://cee.ncert.gov.in>

For any query, contact CEE-2026 Help Desk phone +918280337189/+918280337190 or the e-mail ID: ceesupport2026@riebs.ac.in

S.No.	Important Events	From	To (Last Date)
1	On-line Registration and Submission of Application Form	15/05/2026*	05/06/2026*
2	Downloading Admit Card	20/06/2026*	28/06/2026*
3	Date of Common Entrance Examination (CEE) -2026	28/06/2026* (Sunday)	
4	Last date of Uploading the Marks of the Qualifying Examinations for Applicants appearing CEE-2026 (Integrated M.Sc.Ed.)	20/06/2026*	
5	Last date of Uploading the Marks of the Qualifying Examinations for Applicants appearing CEE-2026 (M.Sc.Ed./B.Ed./ B.Ed.-M.Ed./M.A. in Education Technology/M.Ed.)	30/06/2026*	
6	Answer Key Release and Objection Submission Window	To be notified later	

*Subject to change by notification in CEE Portal.

Principal
RIE, Bhubaneswar

DDCA Certificate Distribution cum Dinner Programme agiogo



Dimapur District Cricket Association (DDCA) ajanga 2026 District Tournaments nung takok angur asoshi Certificate Distribution cum Dinner Programme ayongzükba mapang tangokba noksa nung angur.

Dimapur, Monupii/May 12 (TYO): 2026 District Tournaments nung alakteta shilem tajung agitetba tenüngsang agüja Dimapur District Cricket Association (DDCA) pur Certificate Distribution cum Dinner Programme ka ayongzükba liasü.

U16 Multi-Day Inter District Tournament nung U16 Boys team runners-up liasü aser 6th Late G. Rio Men's

U19 Inter District Tournament nung U19 team ponguben champion ama liasü. Senior Men's Inter District Tournament 2026 nung Senior Men's team runners-up jenjang atong.

DDCA-i 2026 season nung bendanga agütsür meranga inyakba atema asayar ajunga nem kinungertem lia tenüngsang agüja liasü.

Sentong nung DDCA General Secretary Mr. C.K.

Mech-i asayartem nem tenüngsang agütsü aser DDCA Vice President Ex-Major Vikuto Assumi-ia iba asaya nung nüngdakba yimya indang jembia liasü.

DDCA President Choba Lotha aser ketdangsür temia asayar nem tenüngsang agütsü aser NCA kübok cricket asayar sempet temaba jenjangi ajungkettsü DDCA temulungtetba lir ta metetdaksü.

Jose Mourinho-i Real Madrid manager inyaktsü



Jose Mourinho

Madrid, Monupii/May 12 (Agencies): Bernabeu nung lir küm 13 sülen Jose Mourinho ano Real Madrid indang head coach akumtsü asoshi jembishinü tatem leni arur.

Arishi küm 63 tain ya aginüba tejangja aser tang iba mapa asoshi jembir pa kisüng lir.

Pai tang head coach Alvaro Arbeloa melentsü, shiba Xabi Alonso-i yutsüba sülen January ita ang iba mapa agizükba liasü.

Xabi Alonso-i club yutsür anogo ana lir Real Madrid tir Florentino Perez-i Mourinho shimtsü tebilemba liasü.

Mourinho ya taoba küm September ita küm ana contract zülutepa par linük Portugal nung Benfica indang manager inyaka arur, aser yashi ang pai osangbener dang

pa tarutsü indang tangbo mejembiner ta shia liasü.

"Estoril den asaya ka lir, aser Hombarnü nungi ang tenzüka ni tarutsü nung coach aser Benfica tarutsü indang jembitsü," ta pai ashi.

Honibarnü Estoril Praia den asayatsü aliba ya tang season nung Benfica asoshi asaya tatembangba alitsü.

Deobarnü nungi tenzüka Real Madrid ya Mourinho den tezüngzüktep ka yanglutsü asoshi maongka ka alitsü.

Pa indang contract nung clause ka ajanga Benfica ya tang season indang final asaya asayaba sülen sen 3 million euros atema anogo ter tashi ainshitsü melar.

Pa ya 2010 aser 2013 tsüngta Real Madrid ketdangsür liasü aser iba mapang La Liga, Copa del Rey aser Spanish Super Cup akok.

Iba club yutsüba sülen pa England-i meyipa shilanga Chelsea nung tanaben manager inyak aser iba mapang 2014-15 season nung pa asoshi Premier League titles asem buba aser EFL Cup nguteta liasü.

2015 küm tangatetep nung Chelsea nungi pilaba sülen pa 2016 nung küm asem tezüngzüktep nung Manchester United nung oa aden.

Old Trafford nung mezüng season mapang pai Europa League, EFL Cup aser Community Shield akok, saka iba sülen par teloki junga masayaba mechi December 2018 küm mapa nungi anentsü.

Mourinho ya Tottenham, Serie A nung Roma nunga manager inyak aser Roma nung alidang 2022 küm Europa Conference League akok aser Turkish club Fenerbahce nunga inyak aser taoba küm Benfica dangi ao.

Real Madrid ya 2025-26 campaign takok kata monguteti tembangogo, kong parnok den kasa tokteper Barcelona-i 2-0 agi El Clasico madak takok ngua La Liga title nguogo.

Real Madrid pur Champions League nunga 6-4 aggregate nung German champions Bayern Munich-i quarter-finals nung koka tembangogo.

CDFA-i 3 buba Futsal Tournament 2026 ayongzüktsü

Dimapur, Monupii/May 12 (TYO): Chümoukedima District Football Association (CDFA) ajanga Nova Futsal Ground, Ward-1, Chümoukedima Town nung May 22-24, 2026 anogotem 3rd Futsal Tournament 2026 ayongzüktsü.

CDFA ajanga sangdong ka nung, association nung register süa aliba clubs aser asayartem kisüng iba asayamung nung shilem agidaksütsü, ta metetdaksü.

Iba den CRS ya asayar ajak asoshi alitsüla, ta ashi.

Registration last date May 20 aser team shia registration fee sen 2,000 alitsü. Forms ya

G-Sports nung agütsütetsü, ta ashi.

Iba asayamung nung Champions nem senpet sen 20,000 agütsütsü aser runners-up nem senpet sen 15,000 agütsütsü.

CDFA-isa jelia temelaba magie Chümoukedima district kübok football/futsal tournament mesüra academy melapoktsü/mayongzüktsü ta metetdaksü.

"Temelaba maliba asayamung mesüra academies nung shilem agiba registered officials/referees nem Association nungi tapet temerenshi agütsütsü, ta parnokisa ashi.

Asian games selection trial nung Vinesh Phogat shilem magitetsü: WFI tir

Gonda, Monupii/May 12 (Agencies): Vinesh Phogat den Wrestling Federation of India mangatetep tuluba kumogo, aser WFI tir Sanjay Singh-i star wrestler ya tangbo Asian Games selection trails nung shilem magitetsü ama ashir, koba May 30 nungi tenzüksü lir, kechiaser la anema disciplinary proceedings angatetteptsü mapang nüngdaker.

Vinesh ya Gonda nung Senior Open Ranking Tournament tang aliba nung shilem magidaksütsü ta federation-i nenshia shir anogo ka lir iba osang ya angazüker.

Taoba mapang WFI ajanga Olympian dang 15-page show-cause notice agüja lir, kong lai yimya tajung mamshi, anti-doping dak sendakba nung aibelen ta tai tongloksü aser June 2026 tashi domestic competition nunga shilem magitetsü ta sangdonga liasü.

Ajisüaka Vinesh-i item taitsüba khenyongi magizüker aser federation-i la wrestling nungi pila aliba meshidaki angatet ta ashi.

Hombarnü sangdong ka agütsüba nung, la ket nung International Testing Agency (ITA) nungi temelaba agüja lir aser la January 1, 2026 nungi official training tenzüka tokteptsü temsüa lir ta ashi. ITA yagi wrestling atema anti-doping ken o repranger.

Mangatetep ya shilem ka 2024 Paris Olympics sülen tenzü, kong Vinesh ya competition tenzüker ananü buba nung temang tuozük tali

aliba nguteta tetsür 50kg final nung disqualify sütsü.

WFI ajanga iba mangatetep yagi Indian wrestling tenüng menüksüoggo ta ashir, ajisüaka Vinesh-i National Anti-Doping Rules aser WADA Code kübok aibelenba mali ta ashir.

Mongulbarnü Gonda nungi jembidang, Indian wrestling nung Vinesh tenüng tajung liaka federation-i inyakyim nung atsü-anem makatsü, ta Sanjay Singh-i ashi.

"Vinesh yagi arutsü nüngdak kecha meliasü, kechiaser la nokdanga lir. Saka Vinesh yashi Gonda-i aru, WFI la dang show-cause notice agütsüba kuli rateta ashi. Lai küdang tejangja telangzüba agütsütsü ta ashi. Lai telangzüba agütsüba sülen WFI indang disciplinary committee-i anogo ter tsüngta telemtetba agitsü. Asian Games atema lai shilem magitetsü, kechiaser tetsür wrestlers atema trial ya May 30 nü lir," ta Sanjay Singh-i ashi.

"Lai telangzüba tejangja agütsüteta aser committee-i la shilem agitsü asoshi jaoktsü mapang angutsüna? Nibo makoktsü ama bilemer. World Championships atema trials agitsü asoshi WFI-i la telangzüba nung ajemdaker telemtetba agitsü," ta WFI tiri The Indian Express dang ashi.

Asian Games trials memeneptsü ama ajiteter, saka küm tatemlen Bahrain nung World Championships atema selection trials nung Vinesh shilem agitsü teimla lir, saka ajia disciplinary committee telemtetba dak keta lir.

BILEMDANGANG

"Ayongtem ajak tzüym nung lungok medem, nüburttem ajak leperi asemjen asemer".